

cingitur. Tota campestris, frugibus opima, sed silvis maximam partem indiga. Primaria totius agri urbs *Legeceſtria*, *Leogara*, *Legeceſter* & *Leiceſter* apud authores dicta. Hæc majorem vetustatem quam dignitatem præ se fert. Est & *Loughborrov*, *Lutterworth*, *Hinckly* & *Bosworth*. Atque intra hunc agrum Parochiales Ecclesiæ 200 numerantur. Mediam hunc *Soarus* flumen *Trentam* petens alluit, Orientalem vero partem *VVrekus* fluvius qui *Soaro* demum commiscetur, placide pererrat. *Rutlandia* vulgo *Rutlandſhire*, *Leiceſtrenſi* agro quasi includitur, nisi a Meridie qua *VVellando* fluvio incumbit, & ab Ortu qua *Lincolnienses* attingit: Spatio est multo minori, utpote totius Angliæ provinciola minima. Forma enim fere circulari circumscripta, tantum circuitu colligit, quantum expeditus Eques uno die conficere possit. Non minori hæc regio soli ubertate & amœnitate, licet spatio sit minori. Est in hoc agro *Vppingham*, non ob aliud memorandum, quam quod totius agri primum habeatur opidum, & Scholam elegantem ostendat, quam uti etiam *Okehamiæ*, ad pueros ingenia bonis litteris excolenda, laudabili instituto R. *Ihonſon* Verbi Divini Minister, non ita pridem posuit. Est & *Okehamia* cujus modo mentionem feci. Ecclesiis autem Parochialibus 47 ornatur hæc Provinciola. *VVash*, sive *Guvash* fluvius, qui hunc agrum ab Occasu in Ortum quasi medium intermeat, in duas dispartit partes. Restat in Pinace *Norfolcia* breviter explicanda. Ea vulgo *Northfolke*, id est, si Latine interpretetur, Borealis Populus. Terminus ejus a Meridie *Suffolcia*, ab Euro & Septentrione Oceanus Germanicus, a Zephyro *Ouse* flumen. Regio est ampla fere omnis campestris nisi qua faciles assurgunt colles, admodum opulenta, ovium gregibus refertissima, cuniculisque inprimis ferax: aquis irrigua, silvis non omnino indiga: solum pro locorum diversitate varium, alicubi pingue, luxurians & succulentum, alibi tenue, leve & sabulosum, alibi argillosum & cretaceum. Inter urbes hujus Provinciæ primum occurrit vetusta illa quam memorat *Antoninus* urbs *Sitomagus*, nunc *Thetford*. Raris hæc nunc est habitatoribus, licet satis ampla, olim vero frequens & celebrata. Est etiam in hac Provincia *Norwicus* urbs celeberrima, Anglis *Norwich*: & *Tarmouth* portus opidumque elegantissimum, loci ingenio, & solerti opera permunitum. Quamvis enim aquis pæne circumvallatur, ab Occasu flumine, quod versatili ponte insternitur, ab aliis partibus Oceano, nisi ad Septentriones qua continens est, mœnibus tamen satis firmis quæ cum flumine formam quadrilateram oblongiorem efficiunt, pulcherrime includitur. Item *Ashellwell-Thorp*, *Dis*, *Shelton*, *Skulton*, *Attleburgh*, *VVaubarne*, *Lynne*, *Sovaffham*, *North Elmham*, *Dereham*, *VVindham*, *Ichorovv* & alia. Opida enim mercatoria 27 villas & pagos sexcentos viginti quinque hæc regio exhibet, & Parochiales Ecclesiæ plus minus 660. Fluvii eam irrigant *Ouse*, *Thet*, *VVaveney*, *Gariensis* Anglis *Gerne*, fere & *VVentſus*. Et ut de Mari aliquid etiam addam, è regione *Tarmouth*, *Halecum* captura totius Orbis est uberrima & quætuosissima. Incredibile enim videatur, quantæ & quam frequentes Nundinæ hic ad festum *Michaëlis* habeantur, & quanta vis *Halecum*, aliorumque piscium distrahatur. Porro soli hujus provinciæ bonitatem de qua supra loquuti sumus, vel ex eo colligas, unde *Varro* colligere jubet, quod *Incolæ* optime niteant, ut taceam ingenia versutissima, & in iure Anglico municipali acerrima. Sed de his satis copiose, ad Tabulam sextam tranſeo.

*Soli fertilitas.*

*Urbes & Opida.*

*Flumina.*

*Rutlandia.*

*Situs.*

*Soli fertilitas.*

*Opida.*

*Norfolcia.*

*Situs.*

*Soli qualitas.*

*Urbes & opida.*

*Flumina.*

*Muris cotinua.*

*ditas.*

*Incolarum multitudo.*